

I

A

N

E

C

RELATION

DE CE QVI S'EST PASSE'

DE PLUS REMARQVABLE

AVX MISSIONS DES PERES
de la Compagnie de IESVS,

EN LA

NOVVELLE FRANCE,

és années 1661. & 1662.

*Enuoyée au R. P. André Castillon, Pro-
vincial de la Prouince de France.*



A PARIS,

Chez SEBASTIEN CRAMOISY, Et SEBAST.
MABRE-CRAMOISY, Imprimeurs ordinaires
du Roy & de la Reine, rue S. Iacques
aux Cicognes.

M. DC. LXIII.

AVEC PRIVILEGE DV ROY,



R



ben
le
est
de
can



RELATION

DE CE QVI S'EST PASSE'
en la Mission des Peres de la
Compagnie de IESVS au païs
de la Nouvelle-France, depuis
l'Esté de l'année 1661. jusques à
l'Esté de l'année 1662.



ON R. P.

Pax Christi.

*Il ne se donne quasi aucune
benediction en l'Eglise; que par
le signe de la Croix. Si ce signe
est la marque de benediction &
de salut, nous sommes riches:
car nous auons des Croix de*

tous costez. La plus rude &
la plus pesante, nous vient de
la part des Iroquois, qui nous
tuent, & qui nous massacrent
tousiours, qui détruisent in-
cessamment nos Alliez, & qui
ferment par tout, la porte à
l'Euangile. Nous auons ap-
pris avec joye, que le Roy veut
leuer ces obstacles, & qu'il veut
donner liberté à nos Mission-
naires, de porter Iesus-Christ
dans toutes ces vastes contrées.
Que Dieu le benisse à iamais,
& toute la Maison Royale.
Le plus grand moyen d'affermir
solidement son Royaume, c'est
d'establiir celuy de Iesus-Christ.
On nous escrit que sa Majesté
a commencé d'enuoyer cette an-

née deux vaisseaux pour cét
effet : mais ils sont partis si tard,
qu'ils ne paroissent point encor,
quoy que nous soyons déjà bien
auancés dans le mois de Septem-
bre : cela nous met dans l'appre-
hension & dans la crainte de
quelque malheur. Plaise à nostre
Seigneur de preuenir ce coup,
& comme il a couronné nostre
Grand Prince de tant de gloire,
de luy faire porter le nom de
Conquerant dans l'Amerique,
aussi bien que dans l'Europe ; de
l'honorer de la conquête des Isles,
aussi bien que de la conquête des
Villes & des Prouinces. Ses victoi-
res sur la terre, le rendent recom-
mandable en terre : ses victoires
pour le ciel, le rendront recom-

mandable au ciel. C'est là où
doivent tendre ses pensées: c'est là
où tendent nos prieres & nos
vœux pour sa Majesté, & pour
le repos de ces pauvres Eglises
affligées. Nous vous supplions,
Mon R. P. d'y joindre le secours
des vostres, & de celles de tous
nos Peres & de nos Freres de sa
Prouince.

De V. R.

Le tres-humble & obeïssant
seruiteur en N. S.

HIEROSME LALEMANT.

A Kebec, ce 18.
de Septembre 1662.



TABLE DES CHAPITRES
contenus en ce Liure.


- CHAP. I. **D**iverses guerres des Iroquois. pag. 1.
- CHAP. II. Quelques meurtres considerables faits par les Iroquois. pag. 21
- CHAP. III. Hyuernement du Pere Pierre Balloquet avec les Montagnais & les Algonquins. pag. 26
- CHAP. IV. Hyuernement du Pere Simon le Moyne au pais des Iroquois Superieurs. pag. 41
- CHAP. V. Retour du Pere Simon le Moine du pais des Iroquois. pag. 60
- CHAP. VI. La deliurance de dix-huit Captifs François. pag. 71
- CHAP. VII. De quelques meurtres faits par les Sauvages de Gaspé, sur les Sauvages nommez les Papinachionetkhi. pag. 93



Extrait du Priuilege du Roy.

PAr grace & Priuilege du Roy , il est permis à SEBASTIEN CRAMOISY, Imprimeur ordinaire de sa Majesté , Directeur de son Imprimerie Royale au Chasteau du Louure , ancien Escheuin , & ancien Iuge Consul de cette ville de Paris, d'imprimer, ou faire imprimer vn Liure intitulé *Relation de ce qui s'est passé en la Mission des Peres de la Compagnie de IESVS , au país de la Nouvelle-France , és années 1661. & 1662.* Et ce pendant le temps de dix années consecutiues. Avec deffenses à tous Libraires , Imprimeurs & autres d'imprimer, ou faire imprimer ledit Liure , sous pretexte de deguisement ou changement qu'ils y pourroient faire , aux peines portées par ledit Priuilege. Donné à Paris, le dix-huictiesme Decembre 1662. Signé, Par le Roy en son Conseil,


MABOVL.



RELATION
DE CE QUI S'EST PASSE'
en la Mission des Peres de la
Compagnie de IESVS au
pais de la Nouvelle France,
depuis l'Esté de l'année 1661.
jusques à l'Esté de l'année
1662.

CHAPITRE I.

Diuerses guerres des Iroquois.



N Ancien disoit assez
bien que la Fortune
est vne ambitieuse, qui
n'aspire qu'à de nobles
rauages ; & qu'elle en veut bien

A

2 *Relation de la Nouvelle France,*

plus aux grands Edifices qu'aux Cabanes champestres, qui se defendent par leur bassesse de la fureur de ce Metéore, pendant que les cimes des hautes montagnes en reçoivent tous les coups.

Peut estre auons nous esté assez humiliez l'an passé, & mis assez bas pour n'estre pas atteints des foudres des Iroquois, qui ont tourné leurs armes ailleurs, & qui sont assez superbes pour dédaigner des conquestes qui leur sont ordinaires. Ils en vont faire à trois & quatre cent lieues d'icy, ne laissant aucun voing de ces vastes forests, qu'il ne remplissent d'effroy & de sang.

Les vns ont pris leur marche vers le Leuant, du costé de la nouvelle Angleterre, pour y combattre les Abnaquiois, qui sont

Sa
tib
qu
tes
a p
eux
par
pre
hab
non
vn p
qu'i
leur
qui
Sauv
terre
y fa
lieu
que
va p
mes
à tre

Sauvages dociles, & bien susceptibles des bonnes impressions qu'on leur donne, ainsi que le tesmoigne vn de nos Peres, qui a par plusieurs fois donné iusqu'à eux par des routes affreuses, & par des chemins de famine & de precipices qu'il faut passer : ils habitent les bords d'une Riuiera nommée Kenebeki, & cultiuent vn païs si delicieux, à leur dire, qu'ils tiennent par tradition de leurs Fables, que le fils de celuy qui a tout fait, voulant se faire Sauvage, n'auoit point trouué de terre plus belle que la leur pour y faire son sejour. C'est dans ce lieu de paix & de delices que quelque bande d'Agniceronnons va porter le trouble avec les armes, pour vanger vn affront fait à trente des leurs, qui voulants

4 *Relation de la Nouvelle France,*
exiger quelque sorte de tribut de
ces peuples, en furent tous mas-
sacrez, à la reserve d'un, qui
apres auoir eu les lèvres d'en haut
trouçonnées, & la teste à demy-
escorchée, fut renuoyé en cét
equipage pour porter la nouuel-
le de ce qui s'estoit passé enuers
ses Compatriotes, avec ordre de
leur dire qu'on les destinoit à vne
semblable ignominie, s'ils en-
treprenoient vne pareille vexa-
tion.

Ces superbes, plus accoustu-
mez à faire la loy, qu'à la subir,
se sont mis incontinent en cam-
pagne, avec dessein d'employer
deux années, auant leur retour,
pour prendre vengeance de cét
affront.

Nous auons appris depuis peu
qu'ils ont déjà bien commencé,

ayant surpris vne bourgagne entiere, lors que tous les habitants estoient yures par les boissens que les Hollandois leurs traittent; de sorte qu'ayant bien pris leur temps, ils s'emparerent du bourg, qui n'estoit plus qu'un grand Cabaret remply d'yvrongnes. Ils firent nager le sang dans les Cabanes aussi abondamment que le vin y couloit auparavant : Ils brullerent en suite les femmes & les enfans, & tous ceux que le fer auoit espargnez. Il n'y eut qu'un vieillard qui trouua grace, parce qu'il n'estoit pas pour lors yvre, & qu'il auoit esté peu auparavant en Ambassade chez les Agnieronnons pour traiter de paix avec eux : Il fut d'abord bien recu à Agnié; & quoy que captif il fut considéré comme un

6 *Relation de la Nouvelle France,*
homme venerable par sa vieillesse & par sa temperance : Apres quelque sejour dans Agnié, il fut, par mal heur, rencontré par cinq ou six Iroquois yvres, qui se saisirent de luy, & sans delay l'attachèrent à vn posteau, où ils luy firent endurer toutes les cruautéz, que la barbarie, jointe à l'yvrongnerie, peut inuenter ; mais il les souffrit d'un visage égal, sans iamais laisser tomber vne larme de ses yeux, ny lascher vne parole de plainte de sa bouche. Quel mal heur pour ce pauvre homme de perir par l'yvrongnerie de quatre ou cinq frippons, apres auoir euté celle d'un bourg tout entier. Voilà donc la guerre du Leuant qui occupe vne partie des Iroquois.

D'autres poussent plus loing

vers le Sud, sans sçauoir bonnement à qui ils en veulent: ils cherchent des hommes qu'ils ne cognoissent pas, ils ont la guerre auant que d'auoir des ennemis. Ils marchent plus de deux cent lieuës dans les Forests, sans boussoles, & sans s'égarer; Et enfin rencontrent la mer vers les costes de la Virginie, à ce que nous presumons. Ils trouuent vn país où l'on ne sçait ce que c'est que de neiges, tout y est tousiours verd, excepté les Castors qui y sont blancs. Les hommes y sont habillez comme les femmes, & les femmes comme les hommes, sur tout pour ce qui est de la coëf-feure. Les Ours, les Sangliers, les Leopards & les Lions peuplent ces deserts bien plus que les hommes; les cocqs-d'Inde &

8. *Relation de la Nouvelle France*,
les poules y vollent en bandes,
comme les Estourneaux en Fran-
ce, & l'on entend le chant du
coq dans les bois, comme l'on
fairoit dans nos villages. Il y a
des forests entieres d'arbres bien
semblables aux palmiers: ce sont,
disent nos Iroquois, des roseaux,
gros & hauts comme les chesnes,
moüelleux & noüez d'espace en
espace; les fucilles ont trois pieds
de longueur, & vn de large, &
deux ou trois poulces d'espaisseur;
elles sont au reste rondes & droi-
tes comme des espées, & seruent
comme de corps-de-garde ou
d'appuy au tronc qui est foible
& molasse de soy mesme, mais
enuironné comme d'vne mu-
raille armée de coutelats. Nos
guerriers rencontrèrent par ha-
zard vn de ces Arbres renuersé,

és années 1661. & 1662. 9

ils s'en approcherent, & trouuerent dans le creux trois grands Ours, qui y logeoient bien au large, & qui s'estoient engraissez de la moüelle de cét Arbre, qui leur seruoit de nourriture, & de logement tout ensemble; de sorte qu'ils ne quittent point la maison qu'apres l'auoir mangée.

Tirant vn peu plus vers le Couchant que vers le Midy, vne autre bande d'Iroquois va chercher jusques à quatre cent lieuës d'icy vne Nation qui n'est criminelle que parce qu'elle n'est pas Iroquoise; on la nomme Ontôagannha, comme qui diroit là où on ne sçait pas parler, à cause de l'Algonquin corrompu qui y est en vsage. Au reste, si nous en croions à nos Iroquois, qui en sont retournez, & aux Esclaves

10 *Relation de la Nouvelle France,*
qu'ils en ont amenez, c'est vn
païs qui n'ayant rien des rigueurs
de nos hyuers, jouït d'une saison
toujours temperée, & comme
d'un Printemps & d'un Automne
continuel; La terre y est si ferti-
le, qu'on en pourroit presque di-
re à proportion ce que les dé-
couvreurs Israélites disoient de la
terre de Promission; Car pour ne
parler que du bled d'Inde seule-
ment, il pousse vne tige si extra-
ordinairement grosse, & si haute,
qu'on la prendroit pour vn ar-
bre, & porte des espics de deux
pieds de long, dont les grains
paroissent comme ceux de nos
gros Muscats: On n'y voit point
d'Orignaux ny de Castors, qui ne
s'habituent que dans les païs
froids: Mais en recompense les
Cerfs, les Buffes, les Porcs sau-

des années 1661. & 1662. II

uages, & vne autre espee de
grands animaux dont nous n'a-
uons aucune connoissance, peu-
plent ces belles forests, qui sont
comme autant de Vergers, n'y
ayant presque que des arbres
fructiers, parmy lesquels vivent
bien en repos des oyseaux de tou-
tes couleurs, & de tous ramages,
sur tout les petits Perroquets qui
y sont en si grand nombre, que
nous auons veu de nos Iroquois
retourner de ces pais avec des es-
charpes & des ceintures qu'ils
s'estoient faites de ces oyseaux
enlassez les vns dans les autres.
Il s'y trouue de plus vne espee
de Serpents d'une prodigieuse
grosseur, & longs de deux brasses;
mais ce sont des Serpents inno-
cents, dont le venin n'est pas ma-
lin, ny la picqueure mal-faisante.

12 *Relation de la Nouvelle France,*
Les hommes n'y sont pas si bons
que les serpents, car ils vient d'un
poison, dont ils sçauent bien l'art
d'infecter les sources, & mesme
les riuieres entieres, & le font
avec tant d'adresse, que les eaux
ne perdent rien de leur beauté,
quoy qu'elles soient toutes cor-
rompuës. Leurs bourgades sont
placées le long d'un beau fleuve
qui les porte jusques au grand
Lac (c'est ainsi qu'ils nomment
la Mer) où ils ont commerce avec
des Europeans, qui prient Dieu
comme nous, & qui ont l'vsa-
ge des Chappelets & des Cloches
pour appeller aux Prieres: A la fa-
çon dont ils nous les depeignent,
nous iugeons que ce sont des Es-
pagnols. Cette Mer est sans dou-
te ou la Baye du S. Esprit dans le
Golfe de Mexique en la coste de

la Floride, ou bien la Mer Vermeille, sur la coste de la nouvelle Grenade dans la grande Mer du Sud: Quoy qu'il en soit, c'est vers ces peuples que les Iroquois Onontagheronnons ont tourné leurs armes, pour appaiser (disent-ils) les ames de ceux des leurs qui y ont esté tuez il y a huit ou neuf ans, & qui ne trouveront point de lieu de repos en l'autre monde, qu'elles n'ayent esté comme expiées par les feux des captifs bruslez: Cruelle expiation qu'ils ont commencée l'hyuer dernier, par de pauvres femmes, & par des enfans à la mammelle, qui ont esté la proye des flammes & de la cruauté de ces trop immisericordieux Barbares.

Vn autre party Iroquois com-

14 *Relation de la Nouvelle France,*
mence vne guerre de deux ans
contre la Nation qu'on nomme
du Bœuf ; Vn autre tourne sa
marche contre la Nation du Pe-
tun du costé des Nezpercés ; Vn
autre estant allé comme à la des-
couuerte d'un païs nouveau, s'est
engagé si auant dans les bois in-
connus, qu'ils y ont pery de faim.

Les autres ont esté plus heu-
reux dans la nouuelle entreprise
qu'ils ont faite cét hyuer dernier
sur nos Sauvages du Nord ; ce
sont ceux vers qui deux de nos
Peres furent l'an passé, par des
chemins escartez de Tadoussac,
quand ils se rendirent à Necouba,
bien à propos pour plusieurs
Neophytes, dont les vns ont esté
instruits tout de nouveau des my-
steres de nostre Religion, & les
autres ont esté reconciliez à Dieu.

Tous ces pauvres Neophytes ont pû, par apres, reconnoistre les soins que la Prouidence a eu de leur salut, leur ayant enuoyé des Missionnaires dans des conjonctures tout à fait admirables; car jamais ny Iroquois, ny François n'auoient mis le pied en leur païs: jamais on n'auoit parlé ny à Agné, ny à Kebec de Necouba; & voila qu'en la mesme année & les vns & les autres y arriuent; mais cette douce Prouidence a voulu que nos Peres y arriuaissent les premiers, pour tirer des feux d'Enfer, ceux qu'ils ne croyoient pas deuoir estre bien-tost iettez dans les feux des Iroquois.

Nous auons appris, ce que nous en allons dire, par deux Sauuages, qui ayans esté pris à Necou-

16 *Relation de la Nouvelle France,*
ba mesme par les Agneronons,
se sont heureusement eschappez
de leurs mains lors qu'ils appro-
choient de leur bourg. L'un des
deux âgé de vingt ans, vsa d'a-
dresse pour sa fuite ; car sur les
chemins ayant mis les Iroquois
en belle humeur, iouant avec eux
tantost aux pailles, tantost aux
dez, qui sont leurs jeux les plus
ordinaires, les prouqua à la
course, deffiant le plus habile
d'eux, tout estropié qu'il estoit.
L'emulation se met dans la com-
pagnie, on s'assemble, on choi-
sit le plus dispos des Iroquois :
le captif entre en lisse avec luy,
& les bornes de la course ayant
esté marquées, ils commencent
à courir à qui mieux, mieux ;
mais ce captif qui regardoit sa
liberté comme le prix de sa vi-
ctoire,

toire, tenoit le deuant avec les acclamations de ses ennemis mesmes, qui changerent de ton, quand ils virent que le Victorieux passoit les bornes qu'ils auoient posées, s'enfonçant dans le bois, & refusant les louanges & la gloire à laquelle on l'inuitoit: Il continuë donc sa route avec autant plus de courage qu'il n'auoit plus de Rival de sa victoire; la crainte & l'esperance luy donnant des forces: mais il courroit à son mal-heur, s'estant inopinément ietté entre les mains d'une autre bande d'Iroquois, qui ne furent pas plus rusez que les premiers: car ils le laisserent échapper, lors qu'ils estoient prests de le ietter au feu.

C'est ce qu'il nous a rapporté à son arriuée à Montreal, disant

18 *Relation de la Nouvelle France,*
que toutes les terres du Nord qu'
n'auoient iamais veu d'Iroquois,
en sont tellement infectées, qu'il
n'y a plus de cauerne assez som-
bres parmy ces grands pais de
rochers, pour s'y cacher, ny de
forest assez profonde pour y con-
fier sa vie; que dès le commen-
cement de l'hyuer ils ont fait
vne grande prise de plusieurs fa-
milles, composées d'hommes,
de femmes & d'enfans, qui n'ont
jamais combattu contre d'autres
ennemis que contre leurs Ca-
stors & leurs Orignaux; que pouf-
sant outre leurs victoires, ils
auoient surpris à Necouba bon
nombre d'autres Sauvages, lors
qu'ils estoient occupez à des ob-
seques, ayans iustement pris le
temps qu'ils faisoient le festin
d'un mort, & qu'ils n'auoient en

main au lieu d'armes que des plats & des cuillieres, les obligeant ainsi de continuer pour eux-mesmes les pleurs qu'ils auoient commencez pour ce defunct; que leur dessein n'estoit pas de s'en tenir là, mais de donner iusqu'à la mer du Nord, d'y enleuer comme vn torrent tout ce qu'ils y rencontreront, puis descendre par le lac Saint Iean & par Tadoussac, grossissant toujours, en chemin faisant, le nombre de leurs prisonniers : & enfin remonter par nostre grand fleuve de Saint Laurens, pour passer deuant Quebec, & deuant nos autres habitations, chargez de despoüilles & de victimes, qui embelliront de leurs larmes, & de leur sang la triomphante entrée que ces Barbares se prepa-

20 *Relation de la Nouvelle France,*
rent de faire dans leurs bourga-
des.

Voilà donc, comme nos en-
nemis s'estant esendus par tou-
tes ces contrées, nous ont laissé en
paix cét vne partie de l'Esté, parce
qu'ils ont porté la guerre tout
alentour de nous: de sorte que
nous ne sommes heureux que par
le malheur d'autrui; quoy qu'à
vray dire, le malheur de nos Alliez
est le nostre, puis que la source du
Castor demeure tarie par la per-
te de ceux qui en font le trans-
port à nos habitans.

CHAPITRE II.

*Quelques meurtres considerables faits
par les Iroquois.*

CE peu de repos dont nous
avons iouï, n'a pas esté uni-
uersel : Montreal a finy l'année
passée , & commencé celle-cy
par deux pertes notables. L'une
dans le mois de Février dernier,
par la mort du Sieur Lambert
Closse , qui fut tué par vne ban-
de d'Iroquois, lors qu'il alloit au
secours de quelques François
qui estoient en danger. C'estoit
vn homme dont la pieté ne ce-
doit en rien à la vaillance , &
qui auoit vne presence d'esprit
tout à fait rare dans la chaleur
des combats , il a tenu ferme à

22 *Relation de la Nouvelle France,*
la teste de vingt-six hommes
seulement , contre deux cent O-
nontagneronnons , combattant
depuis le matin jusqu'à trois heu-
res apres midy , quoy que la
partie fust si peu esgale ; il leur
a souuent fait lacher prise ; sou-
uent il les a depossedez des po-
stes auantageux , & mesme des
redoutes dont ils s'estoient em-
parez ; & a iustement merité la
louange d'auoir sauué le Mont-
real & par son bras , & par sa re-
putation : de sorte qu'on a iugé
à propos de tenir sa mort cachée
aux ennemis , de peur qu'ils n'en
tirassent de l'auantage. Nous de-
uions cette Eloge à sa Memoi-
re , puis que Montreal luy doit la
vie.

L'autre perte n'est pas moins
considerable , c'est d'un bon Ec-

clésiastique nommé Monsieur Vignal, qui dans le mois d'Octobre de l'année passée, accompagnant des ouuriers qui alloient querir des pierres en vne Isle voisine de Montreal, comme ils mettoient à terre sans deffiance, les Iroquois qui se tenoient cachés dans les bois, se ruèrent à l'improuiste sur eux, avec vn grand cry, & dès la premiere descharge de leurs fuzils ils en tuerent trois sur la place, blesferent les autres, & se saisirent de Mr Vignal, qui auoit déjà receu plusieurs playes, desquelles il mourut peu de temps apres entre leurs mains. Sa vie estoit d'vne tres-douce odeur à tous les François par la pratique de l'humilité, de la charité & de la penitence; vertus qui estoient ra-

24 *Relation de la Nouvelle France,*
res en luy & qui le rendoient aimable à tout le monde ; & sa mort a esté bien precieuse aux yeux de Dieu, puis qu'il l'a receuë de la main de ceux pour lesquels il a souuent voulu donner sa vie ; il auoit de grandes tendresses pour leur salut, il s'est offert plusieurs fois de nous venir joindre, quand nous estions à Onontagué, afin de trauailler conjointement à la conuersion de ces Barbares ; & il l'auroit fait, si sa complexion & ses forces eussent correspondu à son courage & à ses ferueurs.

Dans ces accidens qui nous sont aussi sensibles que les personnes que nous perdons, nous sont precieuses, nos courages sont releuez par l'esperance que nous donne nostre bon Roy, d'un grand secours, qui va faire

reigner la Foy par la destruction
des Infidelles , & donner la vie
à plus de cinquante Nations par
la ruine de quatre ou cinq bour-
gades. Nous sommes dès cette
année dans l'attente de deux vais-
seaux chargez de quelques sol-
dats , qui dissiperont vne partie
de nos craintes. Nous répon-
drons aux salues de leurs Ca-
nons , par des benedictions pu-
bliques , dont nous remplirons
l'air pour nostre incomparable
Monarque , qui donnant ses soins
à toute la France , les veut bien
estendre jusqu'au delà des Mers,
pour faire part à ses Sujets de ce
Nouveau monde, du repos qu'il a
procuré à toute l'Europe.

CHAPITRE III.

*Hivernement du Pere Pierre Bailloquet,
avec les Montaignais & les
Algonquins.*

LEs Sauvages qui passent de ce monde entre nos mains, semblent vouloir quitter tout ce qu'ils ont de barbare avant que de quitter la vie ; ils meurent pour la pluspart , aussi bons Chrestiens , que s'ils n'auoient iamais vescu en Sauvages ; Et ils ont alors des sentimens de deuotion qui ressentent plustost les Cloistres que les bois.

Nous auons fermé les yeux , il y a quelque temps , à vn bon Huron , nommé Louis Aquienhio , qui est mort en Saint , pen-

dant quatre mois de maladie, il fit vn Temple de sa Cabane, & son écorce, sur laquelle il estoit estendu, estoit comme vn Sanctuaire, où il consacroit toutes ses souffrances par vne merueilleuse patience, & par des prieres continuelles: Tous ses desirs n'estoient que pour le Ciel, & toutes ses paroles n'estoient que des choses celestes: Monseigneur l'Euesque de Petrée, qui a de grandes tendresses pour ces pauvres Sauvages, ayant eu la bonté de le visiter dans le fort de son mal, & luy ayant fait gagner l'Indulgence des moribons, il s'écria en suite: I E S V S ! enleue-moy, ie n'ay plus rien à faire en ce monde; I E S V S enleue-moy ! paroles, qui ont vne douceur, & vne energie toute particuliere en Langue

28 *Relation de la Nouvelle France,*
Huronne; aussi les auoit-il tous-
jours au cœur & en la bouche.
Peu de temps auant que de mou-
rir, estant fort bas & tout extenué,
quelqu'un des assistans ayant dit
par compassion: hélas qu'il est
défiguré, il n'est plus semblable
à luy-mesme! A ces paroles,
qu'il entendit, il r'anima tous les
esprits, & d'une voix assez forte,
quoy que mourante, il se mit à
chanter sa Chanson de mort,
qu'il composa sur le champ, dont
le refrain estoit, *Je ne suis plus
semblable à moy-mesme, mais ie se-
ray bien-tost semblable à mon IESVS;*
& ne quitta point cette Chanson,
que pour reprendre sa priere or-
dinaire: *I E S V s enleuez-moy!*

Sa femme, tres-bonne Chre-
stienne, l'animoit à ce saint exer-
cice par de continuelles exhor-

tations, qui n'estoient pas moins
saintes pour sortir d'une bouche
Maronne ; Elle luy seruoit de
Maistresse en nostre absence, &
ne luy parloit plus que du Ciel,
l'encourageant d'y aller au plu-
stost, puis qu'il y auoit vn de ses
petits enfans qui luy tendoit les
bras. Les deux iours qui prece-
derent sa mort, elle inuenta vne
façon d'assister les moribons qui
ne tient rien du Sauuage ; elle se
resolut de si bien employer ces
derniers momens, qu'il n'y en
eût pas vn, qui ne fust sanctifié
par la priere ; imitant en quelque
façon nos Quarante-heures qu'elle
auoit veuës dans nostre Eglise.
Elle pria vne de ses parentes de
l'assister dans ces derniers de-
voirs qu'elle vouloit rendre à son
mary. Elles commencent donc

30 *Relation de la Nouvelle France,*
cette ingenieuse inuention de
pieté, par vne Oratoire d'ecor-
ce, qu'elles dressent auprès du
malade, & là ne cessent de prier,
tantost l'vne, tantost l'autre, tan-
tost toutes deux ensemble : se
releuant l'vne l'autre, en sorte
qu'elles continuerent iour & nuict
ces charitables offices, iusqu'au
dernier soupir du malade, qui
rendit l'ame avec ces paroles,
I E S V S enleue-moy!

Cette courageuse femme, qui
auoit retenu ses larmes, pendant
toute la maladie de son mary, de
peur de l'attendrir, & le diuertir
de la pensée de Dieu, lascha la
bonde à les yeux, si-tost qu'il eut
expiré, & en versa sur luy vne si
grande quantité, qu'elle fit pa-
roistre & sa constance à les rete-
nir, & sa tendresse à les donner

quand il faut. Il est vray que c'estoient des pleurs resignez & des larmes meritoires; car elle s'en alla bien-tost les verser au pied des Autels, pour esteindre, disoit-elle, les flammes du lieu par où l'ame de son cher mary deuoit passer: elle voulut en cela contrecarrer l'ancienne coustume des femmes Huronnes, qui à la mort de leurs maris, se tenoient enfermées durant cinquante iours, sans parler à personne, pour tesmoigner l'excez de leur douleur par ce rigoureux silence, & par cette solitude superstitieuse.

Vne bonne Algonquine, femme d'un ancien Capitaine, se trouuant en danger de mourir à trente lieuës de Quebec, quoy qu'elle se fust confessée quelque temps auparauant, souhaita si

32 *Relation de la Nouvelle France,*
passionnément d'expirer entre
nos bras , qu'elle enuoya icy ex-
prés , & fit porter cette parole au
Pere , qui a soin de la Mission Al-
gonkine : haste-toy mon Pere! ne
tarde pas, car ie m'en vay mourir,
& desia ie sens mon ame sur le
bord de mes levres ; ie l'arreste-
ray neantmoins quatre iours pour
la mettre entre tes mains , & si tu
ne peux te rendre assez à temps
pour la recevoir , prepare-luy du
moins les chemins de l'autre
monde , par tes prieres.

La grande confiance qu'ont
en nous les Sauvages , les fait
souhaitter d'auoir avec eux quel-
ques vns de nos Peres , quand ils
vont hyuerner dans les bois.
L'Automne derniere, les Monta-
gnais de Tadoussac & quelques
Algonkins d'icy , nous firent cet-

te

te
ce
ue
aff
teu
ing
tes
pas
s'y
C
qui
Paf
vie
me
que
c'el
hof
d'au
n'au
ma
en
asse

te demande avec grande instance; c'estoit pour aller passer l'hiver vers les Monts Nostre-Dame, assez renomméz icy pour leur hauteur, & pour estre le pays le plus ingrat, & le plus affreux de toutes ces contrées; mais on n'en peut pas trouver de trop horrible pour s'y mettre à couvert des Iroquois.

Ce fut le Pere Pierre Bailloquet qui leur fut donné pour estre le Pasteur de cette Eglise errante. La vie qu'un Missionnaire est obligé de mener en ces voyages, est celle que meinent les Sauvages mesme, c'est à dire: n'avoir point d'autre hostellerie que les bois; point d'autres matelas que la neige, n'avoir point de demeure fixe; mais chercher sa vie de montagne en montagne, point de provisions assurées, sinon celles que four-

34 *Relation de la Nouvelle France,*
nit la prouidence, laquelle ne
veut pas touïours faire miracle,
pour transporter les orignaux,
comme elle faisoit autres-fois
pleuuoïr des cailles. Il faut auoir
l'estomac fait à la faim, les yeux à
la fumée, & les pieds à la neige:
plus le temps est mauuais, tant
meilleur en est il, par ce que la
chasse est plus heureuse: on ne
cherche que des pays aspres, ru-
des, & difficiles, par ce qu'on at-
tint plus aisement les bestes; on
se déplaist aux beaux iours, & les
tempestes reiouissent le chasseur,
qui fait ses meilleurs coups pen-
dant ces plus mauuais temps; de
forte qu'il n'y a rien plus à crain-
dre qu'un hiuer doux, & les bel-
les saisons causent les grandes fa-
raines: en vn mot, ce n'est pas
viure sinon d'une vie de Sauua-

ges, qui sont faits aux iniures du temps, comme leurs elans & leurs castors. Et certes, cette vie ne seroit pas tenable à vn Missionnaire dans ces fatigues, s'il ne goustoit les fruits de deuotion, & de douceur, dont ces deserts sont fertiles, & que l'amour de I E S V S-CHRIST rend sauoureux.

L'innocence y loge, & y est tout à fait admirable. Voicy comme en parle le Pere, dans vn bout de Lettre, qu'il a escrite touchant son hiuernement. I'ay trouué que le vice reigné dans les villes bien plus que dans les forests, que le commerce des bestes n'est pas si mal faisant que celuy des hommes, & que nos Sauvages viuent dans vne si grande innocence, que ie n'ay pas iugé qu'ils eussent besoin de s'approcher bien sou-

36 *Relation de la Nouvelle France,*
uent du Sacrement de Penitence:
ie ne parle pas seulement de ceux
que i'ay cultiuez pendant l'hiver;
mais aussi de ceux que ie n'ay veu
que par reprise, & de ceux que
ie n'ay pû aboucher qu'au Prin-
temps.

Ceux-cy n'eurent pas plus tost
apris de mes nouvelles, que quel-
ques vns d'eux vindrent de dix-
huit lieües sur les neiges pour se
confesser, & me donner asseu-
rance que plusieurs autres sou-
haitoient avec passion de le faire:
Ils m'encourageoient à entrepren-
dre le voyage, pour la consola-
tion particuliere de quantité de
meres, qui ne pouuoient quitter
leurs enfans, ny les porter par
des chemins si fâcheux; elles s'of-
froient néanmoins de faire la
moitié de ces chemins de preci-

pices. Nous ne desirons pas (disoient ils) que tu fasses vingt cinq lieües en raquettes, pour visiter toutes les cabanes les vnes apres les autres, en vn temps, auquel le degel des riuieres, & des torrens rend ces chemins non seulement difficiles; mais dangereux: incommode toy neátmoins vn petit pour la cōmodité de tant de personnes; approche toy de nous, & nous approcherons de toy, afin que nous puissions sanctifier vn temps, qui est Saint par tout le monde. Ils vouloient parler de la semaine sainte de laquelle nous approchions.

Je leur épargnay la peine à laquelle ils s'offroient de si bon cœur, ie fus les visiter tous, les vns apres les autres, & ie trouuay qu'ils n'auoient iamais manqué

38 *Relation de la Nouvelle France,*
pendant tout l'hyuer, de dire le
matin à genoux les prieres ordi-
naires, & le soir le Chapelet.

Voilà des bois, & des rochers
bien sanctifiez. Je fus receu dans
toutes leurs cabanes avec vne
ouuerture de cœur tout à fait ai-
mable: car l'hospitalité se trouue
dans ces bois, quoy qu'ils n'ayent
pour hostes que des Barbares:
Nous auons esté reduits à ne viure
que de pores-epics, la chasse de
l'orignac n'ayant pas esté heureu-
se; & non seulement nos Sauua-
ges ont souffert la famine avec
resignation, & sans rien obmet-
tre des prieres que nous adres-
sions tous les iours au Ciel; mais
de plus, ils ont receu avec toute
la charité imaginable, l'equipage
de deux Chaloupes de nos Fran-
çois, qui n'ayans pû gagner

Quebec avant l'hiuer, ont esté
contraints de le passer dans nos
Forests: où ils ont trouué, que tou-
tes nos cabanes estoient comme
autant d'hostelleries où ils ont esté
reçus à table d'hoste, sans rien
payer. Nous n'eussions jamais
creu, disent ces François, que des
Sauuages nouvellement Baptisez
priaissent si bien Dieu, si nous ne
l'eussions veu tout cét hiuer, &
nous n'aurions jamais pensé que
des Barbares fussent si charita-
bles, si nous ne l'eussions esprouué,
par nous mesmes. Chaque chef de
famille nous eust voulu auoir
chez soy, s'il eust eu autant de com-
modité que de bonne volonté; &
le principal d'entre eux, voyant
qu'un de nous estoit malade, alla
chercher des remedes par des che-
mins tres-rudes, & marcha qua-

40 *Relation de la Nouvelle France,*
tre iours de suite, sans s'arrester,
non pas mesme à tirer les ori-
gnaux qui se presentoient à luy, &
cela, de peur de retarder le soula-
gement qu'il vouloit apporter au
malade.

Le Pere n'en dit pas dauanta-
ge: soit qu'il se contente que
Dieu seul soit tesmoin de ce qui
s'est passé dans ces grandes mon-
tagnes, bien capables par leur
aspreté, de garder le secret; & de
tenir caché tout ce qu'on leur
confie: soit que la famine & les
fatigues qu'il a souffertes, luy ayent
semblé agreables, pour auoir esté
addoucie par l'innocence, & par
la ferueur de son troupeau. Ce qui
luy a fait souuent dire, que sa
Mission estoit tres aimable, veri-
fiant l'Enigme de Samson, *in forti-
tudinedo*, le miel se trouue dans la

gueulle du Lion, la douceur dans l'amertume, & la ioye dans les Croix. C'est le fruits des Missions pleines de trauaux & de danger, telles que sont, pour l'ordinaire, celles de ce Nouveau-monde. Voyons de quelle nature est celle, dont nous allons parler au Chapitre suiuant.

CHAPITRE IV.

*Hyuernement du Pere Simon le Moyne
au païs des Iroquois Superieurs.*

VOICY vne Mission de sang, & de feu: de sueurs, & de larmes: de Captifs, & de Barbares. C'est vn pays, où la terre est encor teinte du sang des François, où les eschafaux sont encor dressez & couuerts de leurs cendres,

42 *Relation de la Nouvelle France,*
où ceux qui ont surueſcu à la
cruauté, en portent des marques
funeſtes aux pieds & aux mains,
dont les ongles ſont arrachez, &
les doigts coupez ; où enfin le
Pere Simon le Moyne eſt depuis
vn an, pour receuoir les ſoupirs
de cette Eglise affligée, & pour
prendre part, comme vn bon
Pasteur, à toutes les miſeres de
ſon cher Troupeau.

Son employ, pendant tout
l'hyuer, a eſté auprès de trois
Eglises, vne François, vne Hu-
ronne, & vne Iroquoise : Il a con-
ſerué la pieté parmy les François
captifs, & a eſté le ſeul depofi-
taire de toutes leurs afflictions :
Il a releué l'Eglise Huronne, au-
tresfois ſi floriffante dans le païs
des Hurons : Il a ietté les fonde-
mens d'vne nouvelle Eglise Iro-

quoise, allant d'un bourg à l'autre, pour y baptiser les enfans & les moribonds, & pour instruire ceux qui dans le fond de la barbarie, n'estoient pas bien éloignez du Royaume de Dieu.

Vne petite Chapelle faite d'ecorce & de bastons, estoit le Sanctuaire, où Dieu receuoit tous les iours les adorations de ces trois Eglises. Les François s'y rendoient assiduëment tous les matins, demie-heure avant le iour, pour y entendre la sainte Messe: ils s'y trouuoient tous les soirs pour y reciter en commun le Chapelet, & souuent, pendant le iour, pour se consoler avec Dieu de leurs miseres, & pour se décharger sur sa bonté, des amertumes de leur captiuité: C'est là qu'ils ioignoient des mains à demy tronçonnées, & les leuoient au Ciel; pour ceux

44 *Relation de la Nouvelle France,*
mesmes, qui les auoient si mal
traités.

Et non seulement ceux qui sont
avec le Pere, ont ces bonnes vo-
lontés pour leurs bourreaux; mais
les autres qui sont éloignés de
luy, écriuent dans les mesmes
sentiments, comme il paroist
par vne Lettre de l'un des deux
François pris avec feu Monsieur
Vignal, & mené à Onneiont;
celuy qui l'escriit, a eu le bras droit
cassé dans sa prise, & croy-t'on
que c'est celuy des deux, que ces
Barbares ont tué, pour n'estre
pas plus long-temps chargés d'un
homme estropié. Voicy la teneur
de sa Lettre, qui a de trop bons
sentiments, pour n'estre pas cou-
chée dans ce Chapitre. Il écrit au
Pere Simon le Moyne, qu'il sça-
uoit estre à Onnontagné, enuiron
vingt lieües éloigné de luy.

Nous sommes deux prisonniers de Montreal à Onneiont. M^r Vignal a esté tué par ces Barbares, n'ayant pû marcher que deux iours pour ses blessures. Nous sommes arriués icy le premier Dimanche de Decembre en pauvre equipage: mon camarade a déjà deux ongles arrachés: nous vous prions pour l'amour de Dieu, de vous transporter iusques icy, & de faire vostre possible par presents, de nous retirer aupres de vous, & puis nous ne nous soucions plus de mourir. Nous auons fait alliance de faire & patir tout ce que nous pourrons pour la conuersion de ceux qui nous tuent, & nous prions Dieu tous les iours pour leur salut. Nous n'auons trouué icy aucun François, comme nous esperions, ce qui nous

46 *Relation de la Nouvelle France,*
auroit grandement consolé. Je
vous écry de la main gauche.
Vostre seruiteur Brigeac.

De toutes les machines, dont
le Diable se sert, pour ruiner les
bons desseins du Pere, il n'y en a
quasi point de plus forte que le
songe : c'est presque l'vnique di-
uinité du pais, & l'on fait gloire de
mille extrauagances pour obeïr
à ce Dieu de tenebres & de men-
songes. En voicy quelques exem-
ples tirés d'un tres grand nombre,
dont les François Captifs ont esté
les spectateurs, ayants veu cét
hyuer de leurs propres yeux, ce
que leurs oreilles ne leur auroient
pû faire conceuoir.

Vn guerrier ayant songé qu'il
auoit esté fait prisonnier dans le
combat, pour detourner la fata-
lité de ce songe funeste, appelle

à son refusil tous ses amis, les
coniure de le secourir dans son
malheur, & de luy estre de veri-
tables amis, en le traittant comme
vn ennemy; ils se iettent donc
sur luy, le depouïllent tout nud,
le garottent, & le trainent par les
rues avec les huées accoustumées,
le font monter sur l'eschafaut,
allument les feux autour de luy,
& se preparent à luy rendre ce
detestable service par vne cruel-
le compassion. Mais il se conten-
ta de tous ces preparatifs, & après
auoir passé quelques heures à
chanter sa chanson de mort, il
les remercie tous, croyant par
cette imaginaire captiuité, ne
devoir iamais estre veritable-
ment captif.

Vn autre ayant veu en songe
sa cabane en feu, n'eut point de

48 *Relation de la Nouvelle France*,
repos, qu'il ne la vist effectiue-
ment brusler, & les Anciens, après
vne meure deliberation sur cette
matiere, furent, comme en corps,
y porter le feu, qu'ils mirent en
ceremonie, à peu près, comme
les Escheuins de ville le font aux
feux de ioye.

Ce qui arriua à vn troisiéme, est
bien plus extraordinaire: Car ce
miserable rêveur, ne croyant pas
que ce fust deferer assés à son
songe, que de se faire brusler en ef-
figie, il voulut qu'on luy appli-
quast réellement le feu aux iam-
bes, de la mesme façon qu'on fait
aux captifs, quand on commen-
ce leur dernier suplice. Quel spe-
ctacle! de voir ce Martyr du Son-
ge, se faire rostir tout de bon, si
long temps, & si cruellement,
qu'il luy fallut six mois pour se
voir

voir guerir de ses brusleures. Ah mon Dieu ! qu'il se trouue peu de Chrestiens qui voulussent souffrir pour IESVS-CHRIST la centieme partie de ce que cét Infidelle a souffert pour le Diable !

Dans leurs maladies , ils ne trouuent point de meilleure medecine qu'un bon songe ; mais souuent il arriue , qu'une fièvre chaude causant des rêves grotesques & impertinents, met bien en peine les pauvres Medecins.

L'hostesse du Pere , estant incommodée d'une fluxion sur la ioüe , vit en songe comme si elle eust esté guerie par ceux d'une nation estrangere, qui estoient en captiuité dans Onnontague : on les appelle , & on leur ordonne d'appliquer à la malade les plus excellentes drogues , dont vsent

50 *Relation de la Nouvelle France,*
les Medecins de leur pays : Ils
s'y preparent , tout le Bourg s'as-
semble dans la cabane, pour voir
vne cure extraordinaire. D'abord
parurent quelques vieilles , qui
se mirent à danser en cadence, au
son d'une façon de tambour de
Basque : & peu après on voit en-
trer, à pas contés , trois Ours
masquez, sautant sur vne pate,
& puis sur l'autre, & faisant sem-
blant de se ruer sur la malade,
comme pour la deuorer ; mais ce
n'estoit que pour luy estuuer sa
ioüe enflée avec des cendres
chaudes ; enfin les hommes & les
femmes, s'estants ioints avec ces
bestes , firent vne danse capable
de faire rire ceux qui ne porte-
roient pas compassion à l'aveu-
glement de ces peuples , & à la
prompte obeissance qu'ils ren-

és années 1661. & 1662. 51

dent à leur demon. La conclusion fut, que la femme resta bien contente de ces ceremonies; mais aussi malade qu'auparavant.

Ces sottises sont bien ridicules; mais elles ne sont pas bien dangereuses. Celles, qui ont mis par plusieurs fois, le Pere en grand peril, sont funestes, & bien capables de donner de l'exercice à vn pauvre Missionnaire, qui dans cette barbarie, n'a que les bras de la Prouidence sur qui se reposer à la veuë de mille accidents, dont tous les moments de sa vie sont trauersez. Vn ieune homme s'estant veu, en dormant, vestu de la Soutanne du Pere, iugea bien ensuite, que l'accomplissement de son songe seroit difficile; il en veut pourtant venir à bout, quoy qu'il en couste, & pour cela, il

52 *Relation de la Nouvelle France,*
contre-fait adroittement le fol,
court les rües, se iette sur la Chap-
pelle, qu'il brise, & dans sa fureur
ne dit rien autre chose, sinon
qu'il veut depouïller Ondesonk,
(c'est le nom du Pere en Iro-
quois) qu'il veut estre obey, afin
d'obeïr à son songe. La venera-
tion que ces peuples ont pour
cette diuinité, donne bien de la
peine en ces rencontres.

Il fallut dans vne autre occa-
sion, que tous les Anciens s'em-
ployassent pour arrester vn ieune
fol, qui dans l'yurongnerie en-
treprit, non pas sur les habits du
Pere, mais sur le Crucifix de la
Chapelle: Il la rompit de prime-
abord, & y estant entré comme
vn furieux, il se voulut ietter
sur ce bois adorable pour l'enle-
uer; le Pere s'oppose vigoureu-

fement à cette insolence , presenté la teste à la hache , plustost que de souffrir cette impieté , resolu de donner la vie , avant que de lascher le Crucifix. Il se met donc au deuant , pour receuoir sur son corps les premieres violences , de cét emporté & verser son sang pourvn si bon sujet: Le fol instigué de deux Demons , du Songe & de la Boisson , se iette sur luy avec vne rage diabolique , & tenant la hache en main , l'alloit descharger sur sa teste , quand par bon heur les Anciens du bourg , ayans entendu le bruit , accoururent au secours bien à propos , & tirerent le Pere des mains de ce furieux ; n'ayant point d'autre excuse à faire de ce desordre , sinon que le Songe est bien puissant , & qu'il merite de grands respects. D'au-

54 *Relation de la Nouvelle France,*
tres reietterent cette faute sur les
Holandois, qui leur donnent (di-
sent-ils) vne certaine boisson
qui rend fous les plus sages, &
qui fait perdre l'esprit, sans y pen-
ser. C'est de l'eau de-vie dont ils
parlent: Ils en apportent de la
Nouvelle Holande en telle quan-
tité, qu'il s'en tient Cabaret à
Onnontaghé. Quoy qu'il en soit,
& de quelque costé que vien-
nent ces folies, vn Missionnai-
re des Iroquois peut bien dire
avec l'Apostre des Gentils, *Quo-*
tidie morimur, nous mourons tous
les iours: Et avec le Roy des Pro-
phetes, *Anima mea in manibus meis*
semper, qu'il porte son ame entre
ses mains; ou plustost qu'elle est à
chaque moment dans les mains;
des plus infidelles de tous les peu-
ples.

son
on
sur
che
ron
pa
&
l'in
dan
Le
pou
Bar
seu
que
aue
de
que
cet
qui
don
vn

és années 1661. & 1662. 55

Les Iroquois d'Oïogoën, qui sont les moins cruels, & qui nous ont paru les plus affectionnez ; sur tout lors que nous cultiuions chez eux, les restes de l'Eglise Huronne, furent touchez de compassion sur les miseres du Pere, & pour le tirer de danger, ils l'inuiterent d'aller chez eux pendant que ce desordre se passeroit. Le Pere rauy de cét offre, plus pour le salut de ces obligeants Barbares, que pour sa propre seureté, les alla voir pour quelques sepmaines : Il y fut receu avec les acclamations publiques de tout le peuple, & trouua de quoy exercer son zele, & la lancette d'un Chirurgien François qui l'accompagnoit, à qui Dieu donna tant de benedictions dans vn mal assez fascheux, qui cou-

56 *Relation de la Nouvelle France,*
roit , qu'en peu de temps plu-
sieurs malades presque desespe-
rez , furent mis sur pied : ce qui
gaigna les cœurs de tout ce peu-
ple , & ouurit au Pere les portes
de toutes les Cabanes, où il estoit
veu de tres-bon œil , & escouté
avec affection , quand il leur par-
loit des choses de leur salut.

Vn mois tout entier luy fut
trop court , pour baptiser quasi
tous les petits enfans , & pour
consoler vn grand nombre de
bonnes Huronnes Chrestiennes,
à qui vne captiuité de quinze ou
vingt ans, n'a point arraché la
Foy du cœur. Elles font vn Tem-
ple de la Cabane de leurs Mai-
stres : Elles se seruent de Pasteurs
les vnes aux autres, & sanctifient
par leurs prieres des bois & des
champs, où IESVS-CHRIST n'a

point encor receu d'hommage,
que de la part de ces pauvres
Captives. Quelle ioye à ce Trou-
peau dispersé, de reuoir encor
son Pasteur ! Les yeux parlent
plus que la bouche dans cette
heureuse entre veüe ; quel moyen
de se tenir de pleurer de ioye, &
de compassion, voyant ces bon-
nes Chrestiennes pleurer de de-
uotion ? Certes les larmes de cer-
te nature, qui coulent des yeux
d'un Sauvage, essuyent toutes les
sueurs, & adoucissent tous les
trauaux qu'on prend à l'aller
chercher. Il fallut pourtant quit-
ter cét agreable séjour, qui ne
dura gueres qu'un mois, pour
retourner à Onnontaghé, où
Garacontié (c'est celuy sous la
protection de qui sont les Fran-
çois Captifs) estant reuenu de

58 *Relation de la Nouvelle France;*
Montreal, & ayant publié le bon
accueil qu'il y auoit receu, ren-
dit la pareille au Pere à son retour
d'Oïogoen, luy faisant de gran-
des largesses, qui consistoient en
quelques citrouilles, dont ille re-
galoit, & qui sont vn mets bien
delicieux, quand le pain manque,
& quand pour l'ordinaire on
ne fait qu'un repas par iour,
d'un peu de sagamité composée
d'eau pure, blanchie, d'un peu
de farine de bled d'Inde, car c'e-
stoit là le regime de viure le plus
ordinaire du bon Pere. Ce liberal
Sauuage protecteur des François,
ne cessoit de se louer des presens
qu'on luy auoit faits, entr'autres,
d'un beau colier de pourceline
trauillé par les mains des Meres
Vrsulines, avec des gentilleses, &
des ornements qui agreent, & qui

raussent ces peuples ; sur tout, quand on leur dît, que c'estoit l'ouurage de celles qui n'ont pas eu peur de passer la mer, pour eux, & pour l'instruction de leurs petites filles , qu'elles attendent à Kebec quand ils les voudront enuoyer: que s'ils veulent y aller eux mesmes , ils y trouueront encor d'autres filles saintes (c'est ainsi qu'ils nomment les Religieuses) qui les receurent en leurs maladies dans vn grand Hospital basty pour eux , & leur rendront les mesmes seruices, que les Hospitalieres de Montreal ont rendu tout fraischement à quelques vns de leur nation. Voilà ce que nous apprismes sur la fin de l'hyuer, du seiour du Pere , par quelques Sauvages d'Onnontaghé , qui nous vinrent voir sur les neiges, & qui

60 *Relation de la Nouvelle France*,
nous promirent de nous le rame-
ner cet esté, avec tous les Fran-
çois Captifs, pour gages de la
sincerité avec laquelle ils veulent
lier avec nous.

CHAPITRE V.

*Retour du Pere Simon le Moine
du pays des Iroquois.*

ENFIN le Ciel a écouté nos
vœux, & nous a rendu le Pa-
steur avec son petit troupeau,
c'est le Pere le Moine, que nous
auons regardé comme vn hom-
me eschappé des feux, auxquels
il s'estoit courageusement expo-
sé, pour en tirer dix huit Fran-
çois, auxquels il a rendu la vie,
ayant pensé perdre la sienne plus
souuent que tous les iours. Il

n'est pas croyable de quels transports de ioye, estoient saisis ces pauvres Captifs à la sortie du Bourg d'Onnontaghé, qu'ils pensoient deuoir estre leur tombeau; à peine se croyoient-ils en liberté, quoy qu'ils fussent hors du lieu de leur Captiuité, ils ne pouuoient, sur les chemins, se détacher de leur cher Libérateur, qu'ils enuironnoient sans cesse, couronnants ses pas d'un noble Diadème, iusqu'à ce qu'arriuez à Montreal ils en firent vn bel éloge, en se montrant seulement eux mesmes, puis qu'on ne les regardoit que comme des restes du feu, & des victimes heureusement eschappées de l'Echafaut.

Ce fut le dernier iour d'Aoust de cette année 1662. que le Pere parut en Canot au dessous du saut de

62 *Relation de la Nouvelle France,*
Saint Louis , ayant autour de soy
tous ces heureux eschappés , &
vne vingtaine d'Onnontaghe-
ronnons; qui d'ennemis , estoient
deuenus leurs matelots. Ce Ca-
not portant vne enseigne , pour
se faire connoistre comme amy ,
approche doucement de la riue ,
chargé de ces heureux Argonau-
tes, qui font vne décharge de tous
leurs fusils , pour salüer la terre
tant désirée , publiant la paix
par la bouche de la guerre mes-
me: Ils débarquent avec les ac-
clamations , & les embrassements
de tous les François de Montreal.
Pendant qu'ils suivent leur Pa-
steur pour aller rendre graces à
Dieu dans l'Eglise , retournons
sur leurs pas vers Onnontaghé,
ne craignons pas d'y entrer :
parcourrons avec toute asseu-

rance, du moins pour vn temps, les cabanes, où souuent nos François ont bien tremblé de peur, pour remarquer avec plaisir, les lieux tesmoins fideles de leurs larmes & de leur sang.

Commençons nos visites par la petite chappelle d'escorce, qui a veu des merueilles, qui ne paroissent pas dans les grandes Eglises de marbre, & de porphyre; elle n'estoit pas seulement l'Asile de trois Eglises, disons de huit & de dix; puisque il y a dans Onnontaghé, autant de nations conquises, dont quelques vnestrouuent leur salut dans leur perte, & la liberté des enfans de Dieu dans leur Captiuité.

Mais disons quelque chose de plus particulier. Les plus grands soins du Pere, pendant son seiour

64 *Relation de la Nouvelle France,*
parmy ces diuers peuples , ont
esté , de ne laisser eschapper aucun
enfant sans le baptiser. Les Fran-
çois Captifs vsoient d'adresse
pour le soulager en ce noble em-
ploy: la petite verole venüe bien
à propos , faisoit vne heureuse
moisson de ces ames innocentes;
car , de plus de deux cent , qui ont
receu le Saint Baptisme pendant
l'hyuer, il y en a eu plus de six-vingt
qui sont morts , peu apres , pour
s'enuoler au Ciel.

Ses seconds soins estoient en-
uers les malades adultes , pour
les disposer à passer en vne plus
heureuse vie. Il est vray, qu'en
ceux-cy , le succez ne respondoit
pas toûjours à ses desirs , car il
est bien difficile de mourir en
Saint , apres auoir toûjours vescu
en Barbare : souuent on le rebu-
toit

és années 1661. & 1662. 69

toit des cabanes, la charité estant payée de l'ancien reproche, que la foy n'estoit propre qu'à tuer le monde : souuent aussi estoit-il écouté paisiblement, & la grace, qui sçait faire le choix des predestinez, trouuoit place dans le cœur des vns, pendât qu'elle estoit chassée des autres : Il est vray que c'est sur les humbles, & sur les patures qu'elle repose plus volontiers; que sur les riches: elle n'est pas seulement bannies des grands Palais, mais aussi des grandes cabanes, & l'orgueil se trouue dans les bois aussi bien que dans les villes; on remarque aussi bien vn superbe Sauvage dans vne hutte d'escorce, qu'un superbe Empereur dans vn Palais tout d'or. Quand le Pere visitoit des malades qui estoient de consideration, ils terminoient

E

66 *Relation de la Nouvelle France,*
le discours qu'il leur faisoit d'une
vie eternelle, par des desirs d'ob-
tenir quelque remede pour con-
server la temporelle. Et au con-
traire, s'il trouvoit de pauvres
Captifs proche de la mort, il
voyoit bien en, mesme temps,
qu'ils n'estoient pas éloignez du
Royaume de Dieu. Ce qui parut
entr'autres, en vn ieune-homme
de vingt-cinq ans, de la nation
qu'on nomme du Bœuf, esclave
depuis long temps, & qui depuis
trois ans estoit rongé d'un ulce-
re puant, & incurable. Le Pere le
va voir, il luy parle des beautés
du Paradis, & que faut il faire (dit
le malade) pour aller en ce lieu
de delices, dont la mort & les
maladies sont à iamais bannies?
Il faut croire, respond le Pere, hé-
bien ie croy dit il: il faut prier,

à l
ie
m
to
ma
de
si i
que
effe
car
mal
sa p
laiss
seul
trop
faisa
Pere
long
deux
apre
Fran
Fran

à la bon-heure, ie veux prier; mais
ie n'ay pas d'esprit pour cela, tu
m'en peux donner. si tu veux, viens
tous les iours me voir, car mon
mal m'attache icy & m'empesche
de t'aller trouver, & tu verras que
si ie manque d'esprit, ie ne man-
que pas de bonne volonté. Les
effets respondoient à ses paroles;
car pendant tout le cours de son
mal, il ne se plaignoit point de
sa playe, qui ne luy auoit plus
laissé que la peau sur les os; mais
seulement de ce qu'on le laissoit
trop long-temps sans le faire prier,
faisant d'aimables reproches au
Pere, de ce qu'il le laissoit trop
long-temps sans le voir: Cét ar-
deur luy fit meriter le Baptisme,
apres lequel il mourut, & nos
François Captifs l'enterrerent à la
Françoise, tous ravis de l'auoir

68 *Relation de la Nouvelle France,*
veu mourir en si bon Chrestien.

Vne des grandes consolations du Pere, estoit de receuoir quantité de pauvres Heuronnes Captiues, qui venoient comme à la desrobée, des Bourgs voisins, pour faire leurs deuotions dans Onnontaghé : elles partoient d'Oiogoën & d'Onneiout, sous pretexte d'aller vendre ou acheter quelques marchandises du pais, ayants tout leur cœur à celles du Ciel. Cette Eglise Captiue est vne Image de ce qui se passoit dans l'Eglise cachée d'Angleterre, où nos Peres se déguisoient en Marchands, pour faire vn precieux trafic pour l'eternité. L'Exemple des seruantes touchoit les Maistresses, & donnoit enuie à quelques-vnes de se venir faire instruire, fournissants au Pere vne

bien agreable occupation pour les vnes & pour les autres.

Sa grande joye & sa grande consolation estoit, de pouuoir celebrer tous les iours la sainte Messe, au milieu de cette barbarie: mais comme le vin luy manquoit, & qu'il n'en pouuoit recouurer que du costé des Holandois, qui n'estoient pas pour en fournir volontiers pour cét vsage: il leur escriuit pourtant, & leur manda, que dans l'estat où il se trouuoit, il en pourroit bien auoir besoin pour sa santé. Les Holandois luy enuoyerent vn petit flacon bien fermé, & le donnerent à vn Sauvage pour le porter, luy disant que c'estoit vne medecine dont le Pere auoit besoin, qu'il n'en beût pas, s'il ne vouloit encourir vne grande

70 *Relation de la Nouvelle France,*
maladie : C'estoit vne precaution
bien necessaire , car si le Sauua-
ge , assez affriandé au vin des
Holandois , eust eu connoissan-
ce de ce que c'estoit , il n'auroit
iamais rendu le flacon, que vui-
de : & mesme il fallut que le
Pere vlast de la mesme industrie
pour contenter ce Sauvage , qui
demandoit à goustier vn peu de
cette medecine , pour voir si elle
estoit si mauuaise qu'on disoit: Le
Pere prend quelques Pignons
d'Inde, les découpe dans vn peu
de ce vin , le presente à son Sauua-
ge ; Medecine qui opera de si
grandes euacuations , qu'elle luy
osta toute l'enuie d'en demander
vne seconde fois. Et par cette
invention , le Pere avec son cher
Troupeau , ne fut pas priué de
l'vnique bon-heur qui luy restoit

és années 1661. & 1662. 71
dans l'abandon de toutes autres
choses.

Mais voyons comme en tra-
uaillant si bien pour les Sauvages,
il ne s'oublioit pas des François.
C'est vne matiere qui merite bien
vn Chapitre à part , parce qu'elle
contient des circonstances bien
remarquables.

CHAPITRE VI.

*La deliurance de dix-huit Captifs
François.*

LEs vns furent rendus dés
l'Automne passée, & les au-
tres ont esté ramenez cét Esté;
& les vns & les autres confes-
sent , qu'apres Dieu , ils doiuent
la vie au Pere le Moine, qui a si
hardiment exposé la sienne pour

72 *Relation de la Nouvelle France,*
eux, ne craignant pas d'aller en
vn païs, qui fumoit encor des
embrazemens de plusieurs de
nos François.

Dés son arriuée, sa mort fut
concluë, & les ordres déjà don-
nez pour luy fendre la teste; mais
Dieu l'a preserué, par des voyes
qui nous sont cachées, pour la
conseruation des vns, & pour le
salut des autres. Ayant eschappé
ces premiers dangers & les mal-
heureux projets qu'on tramoit
de diuers costez contre luy, il a
passé en suite tout l'hyuer, com-
me captif : mais il souffroit vo-
lontiers ses chaînes, pour rom-
pre celles de nos François; & le
Ciel qui a fait auorter les mau-
uaises pratiques de ses ennemis,
a tellement beny ses desseins, que,
contre toutes les apparences hu-

maines , il a receu la liberté & l'a
donnée aux autres, Dieu s'em-
ployant à la deliurance du Pa-
steur, qui ne songeoit qu'à celle
de son Troupeau. Il n'y en a eu
qu'un seul, dans Onnontaghé, le-
quel portoit le surnom de Liber-
té, qui ne l'a pas obtenuë. Il ioüit
neantmoins de celle dont ioüif-
sent les Enfans de Dieu dans le
Ciel. Il fut pris aux trois Riue-
res l'an passé 1661. & fut donné
à des Maistres, qui le conserue-
rent en vie, & mesme eurent tant
de bonne volonté pour luy,
qu'ils luy chercherent party, &
songerent à le marier à la façon
Iroquoise, c'est à dire, l'engager
dans vn Concubinage perperuel:
Luy, qui en auoit horreur, re-
fuse d'abord : on le sollicite, on
le flatte, on le presse, on le me-
nace, on le veut contraindre, il

74 *Relation de la Nouvelle France*,
est constant dans son refus, il a
recours à Dieu, luy représentant
l'extremité où il est réduit: plus
il prie, plus il se sent fortifié
dans son bon dessein, iusqu'à ce
que ses Maistres lassés de ces re-
buts, se resolurent de luy donner
tout net, le choix de la mort,
ou d'une femme; mais ils n'es-
branlerent pas ce cœur gene-
reux avec toutes leurs menaces:
de sorte qu'ils s'en desfirent
soubz apparence de luy vouloir
donner à manger; car à mesme
temps qu'ils luy presentoyent
vn morceau de pain d'un costé,
ils luy deschargerent de l'autre,
vn coup de hache sur la teste, qu'ils
couronnerent ainsi de la gloire
des Martyrs de la chasteté.

Les autres François qui ont
esté deliurés, ont tous ressentý
des effets d'une protection tou-

te extraordinaire de la Diuine Prouidence. Le recit' de quelques-uns n'en fera pas desagreceable, puis qu'il nous donne iuiet de benir le Ciel de tant de soins qu'il a de cette pauure Eglise captiue.

Vn d'eux, auant l'arriuée du Pere, se laissant aller au mauuais exemple, estoit tout prest de s'abandonner au vice, & d'embrasser la vie de Sauuage, ayant déjà lié partie avec quelques Iroquois pour les accompagner en guerre : Il est vray que Dieu le retenoit tousiours comme par la main, disons plustost par vn doigt, qui luy ayant esté couppé, au commencement de sa prise, ne se guerissoit point, quoy qu'on y eust appliqué tous les remedes ordinaires : Le Pere arriuant, remedia à sa plus grande maladie,

76 *Relation de la Nouvelle France,*
luy conseillant quelques deu-
tions enuers la sainte Vierge, qui
eurent vn si bon effet, qu'en peu
de iours il fut deliuré de sa tenta-
tion, & guery du mal qu'il auoit
en la main depuis plus de six
mois.

Il a ensuitte fort bien employé
cette main, en quelque façon mi-
raculeuse, s'en seruant à baptiser
les enfans, que non seulement il
cherchoit dans toutes les Caba-
nes, mais il alloit encor atten-
dre au passage les Carauanes des
Sonnontôëronnons, qui vont en
grandes bandes, en traite, de
peur d'estre rencontrés de leurs
ennemis. Il arriestoit donc toutes
les meres avec leurs enfans dans
quelque defilé, & les sçauoit si
bien gagner, qu'en peu de temps
il a baptisé plus de soixante en;

fans , dont la pluspart sont morts de la maladie courante.

Vn autre François estoit captif à Onneiout , souffrant des miseres tres-grandes , dont Dieu le deliura par le moyen d'un enfant, qui n'auoit que cinq ans , & qui à peine pouuoit parler , il luy sceut neantmoins si bien faire entendre (quoy que le François ne sceût point du tout sa Langue) qu'on auoit dessein sur sa vie, qu'il prit cét auertissement comme s'il fust venu du Ciel par cette bouche innocente. Il conclud donc sa fuitte : il sort à mesme temps du bourg d'Onneiout à dessein d'aller trouuer le Pere à Onnontaghé: mais il ne scauoit par où aller, ne sachant pas mesme de quel costé estoit Onnontaghé: Il se iette dans la premiere route

78 *Relation de la Nouvelle France*,
qu'il rencontre sans la connoistre,
il marche assez long temps dans
des chemins perdus, la faim le sui-
uoit de pres ; mais le feu estoit
plus fortement empraint dans son
imagination ; il se console dans
sa solitude, de ce qu'il a plus de
moyen de faire ses prieres que
dans le bourg. Il auançoit donc
toujours à petits pas, & avec assés
d'assurance. Se iugeant déjà
assés loing de ses ennemis, voi-
là qu'il en apperçoit vne troupe,
qui venoit à grand pas vers luy ;
il creut pour lors estre perdu, &
il ressentoit déjà la cruauté des
feux, qu'il pensoit estre allumés
pour le brusler : il auoit bien rai-
son, car en matiere de captiuité,
il en est comme des maladies, où
la recherche est pire que le mal : il
se iette neanmoins assés adroite-

ment hors du sentier, laissant passer ces Iroquois, qui ne s'apperceurent de rien, ce qui sans doute est bien rare parmy eux, puis qu'ils ont les yeux admirablement perçants pour decouvrir de loing, & pour reconnoistre les pistes : les premiers estans bien avancez, nostre fugitif se iette dans vne autre route perdue, faisant mille remerciements au Ciel d'une si signalée protection; mais voilà, que tout d'un coup, il en apperçeut vne autre bande, dans les mains de laquelle il s'alloit ietter. Il ne falloit qu'estre veu pour estre condamné au feu : mais la mesme Prouidence qui l'auoit dérobé, la premiere fois, de la veüe des vns, le déliura, pour la seconde, des mains des autres,


80 *Relation de la Nouvelle France,*
& le conduisit à l'aveugle, jusques
dans Onnontaghé, & par bon-
heur le fit entrer dans vne Caba-
ne, où estoient quelques Sauua-
ges amis des François. D'abord
qu'ils le virent, & qu'ils le re-
connurent comme fugitif, ils
ietterent vne couverture sur luy
pour le cacher, luy donnant seu-
lement quelque peu de chose à
manger, la faim l'auoit réduit
en vn pitoyable estat. Le trait
de la Prouidence sur luy, est, que
s'il fut entré dans la Cabane voi-
sine, il estoit perdu; car il y eut
trouué ceux de la Nation qu'il
fuiſoit, qui par hazard y estoient
pour lors, & n'eussent pas man-
qué de se saisir de luy, pour en
faire vn exemple public à tous les
fugitifs. Estant donc ainsi heu-
reusement caché, on en vient au
plu;

plustost auertir le Pere, afin qu'il s'employast pour luy, & qu'il fist les presens necessaires en ces rencontres : pendant quoy, ie ne sçay comment il se fit, qu'on tira ce pauvre mal-heureux de dessous la couverture, & qu'on l'enuoya luy-mesme pour trouver le Pere : mais apres trois ou quatre pas, il rencontre dans la ruë, des yurongnes, qui sautent sur luy comme sur vn estrange. A cet accident, il tombe palmé à terre, soit de peur, soit de foiblesse : le Pere auerty assez à temps, y accourt, le prend & le meine teste leuée en la Cabane, où il soutint bien des attaques de la part des Onneïochronnons, qui vinrent iusqu'à sept fois pour r'auoir leur prisonnier : mais le Pere respondit autant de fois

82 *Relation de la Nouvelle France,*
qu'ils luy arracheroient plustost
la vie que de le rendre. Son affai-
re enfin s'accommoda avec beau-
coup de peine.

Voicy encor vn accident sur-
prenant. Vn autre de nos captifs
François , fort deuot & de bon-
nes mœurs, auoit fait vœu à Dieu
de consacrer à son seruice sa li-
berté , si iamais elle luy estoit
renduë : mais il auoit rencontré
deux Maistresses d'humeur bien
differentes , quoy qu'également
cruelles ; l'une ne vouloit pas qu'il
fortist de la Cabane , non pas mes-
me pour venir prier Dieu en la
Chapelle , & l'autre ne vouloit
pas qu'il y demeurast : L'une le
chasse , & l'autre le retient ; mais
ny l'une ny l'autre n'auoient au-
cune bonne volonté pour luy ; au
contraire, elles auoient fait, ou fait

faire deux presens assez considerables à certains ieunes fripons, pour luy casier la teste : Que fera ce pauvre ieune homme ? S'il sort, il est coupable, il l'est aussi s'il demeure : Il ne peut obeïr à l'une de ces Maistresses, sans desobeïr à l'autre : & neantmoins il n'y va rien moins que de sa vie dans sa desobeïssance. Le Pere auerty de ces extremitez, le fit euader par le moyen de quelques Iroquois ses amis ; mais il n'eut pas plustost disparu, que ces deux Megeres, qui auparauant estoient irreconciliables à son égard, se reünirent ensemble pour l'attraper. Et pour cela elles mirent leurs parents en campagne. Le pauvre François s'aperçeut bien des poursuites qu'on faisoit pour le prendre, il se ietta à l'eau iusqu'au col, &









IMAGE EVALUATION TEST TARGET (MT-3)



Photographic
Sciences
Corporation

23 WEST MAIN STREET
WEBSTER, N.Y. 14580
(716) 872-4503

84 *Relation de la Nouvelle France,*
trauerfa dans vn Iflet , pour fe ca-
cher dans quelque creux de ro-
cher , & y demeurer, tant que la
nature auroit de la force pour
fouftenir la faim : Il y paffe vn
iour & vne nuit sans manger ; il
ne pria iamais Dieu de meilleur
courage : Les amis du Pere qui
auoient contribué à l'euation du
fugitif, voyans que les amis des
deux Maistresses faisoient tant de
diligences pour le trouuer, en fi-
rent auffi de leur costé. Ils ro-
dent donc par tout, & dans les
bois, & sur le bord de la riuiera,
faifans de semblables recherches,
mais avec des sentimens bien
different, les vns pour luy oster
la vie, les autres pour la luy con-
feruer : Ils l'appellent à pleine
voix chacun de leur costé, mais
aufquels respondra-t-il ? Il en-

tend ces voix du creux de son rocher , mais il prend celles de ses amis pour celle de ses ennemis. Enfin, apres que les vns & les autres eurent bien couru , & bien crié inutilement , les deux bandes se rencontrerent, comme de concert, proche de l'Islet , & par ie ne sçay quelle compassion , ou plustost desespoir de rencontrer le prisonnier , ils s'entrepromirent, que s'ils le trouuoient, ils le mettroient entre les mains du Pere, pour estre à sa discrétion. Si ce pauvre reclus eust entendu ces discours , il auroit bien tost paru ; mais la faim , ou plustost son bon Ange , luy inspira ce qu'il deuoit faire : car sortant de son trou , il va se presenter à eux, pensant s'aller immoler à la mort. Si iamais hommes furent surpris, ce

86 *Relation de la Nouvelle France,*
furent ces deux bandes d'Iro-
quois, qui admirerent comment
le François s'estoit ietté entre
leurs mains si à propos, & iuste-
ment au moment qu'ils s'estoient
accordez de luy donner la vie.
Pour luy, apres auoir adoré la
Prouidence, il ratifia de nouveau
son vœu de consacrer au seruice
de Dieu le reste de ses iours, qui
luy estoient prolongez par des
rencontres si inespérées.

Il y a pareillement quelque
chose de merueilleux, dans la de-
liuarnce des autres captifs, dont
les vns ont euité les feux, les au-
tres les naufrages, par l'assistan-
ce sensible de la Sainte Vierge.
Ce ne fut pas sans merueille, qu'en
descendant d'Onontagué, pour ti-
rer à Montreal, vn des Canots
ayant versé au milieu d'vn fault,

deux François qui estoient dedans, demurerent vn temps notable sous les eaux, sans estre estouffez. Mais, ce qui est plus admirable, c'est que l'un des deux, vint paisiblement à terre par le milieu des precipices, pendant que l'autre faisoit du dos du Canot renuersé, vn Oratoire, & consacroit ces torrents, par la priere qu'il adressoit à Dieu, & à la Sainte Vierge, au milieu de leurs bouillons.

Iene sçauois mieux terminer ces beaux accidés, que par vn rencontre assés illustre touchant vn Crucifix de deux pieds de haut, ou environ, que les Iroquois Agnieronnons enleuerent l'an passé à Argentenay, dans l'Isle d'Orleans, quand ils y firent les degasts, que nous auons racontez: le ne sçay si ce fut par mocquerie, ou par

88 *Relation de la Nouvelle France*,
estime qu'ils se faisirent de cette
image : quoy qu'il en soit, ils
l'emportèrent iusques dans leur
pays, & la faisoient voir dans leurs
cabanes, comme vne des plus pre-
cieuses despoüilles des François;
Garacontié protecteur des Fran-
çois, estant allé à Agnié, la vit
par hazard : & comme il sçauoit
assez le respect, que nous portions
à de semblables images, il ne vou-
lut pas laisser profaner celle là :
il entreprend donc de la rachep-
ter, il fait vn beau present pour
cela, & pour n'auoir pas de refus,
il fait vn éloge de ce Crucifix,
plus digne de sortir de la bouche
d'vn Predicateur que d'vn Barba-
re; Il l'obtient & par la richesse
de son present, & par l'éloquence
de son discours. Retourné qu'il fut
à Onnontaghé, tout triomphant

d'une si belle action, dont il ne connoissoit pas tout le merite, il place honorablement ce Crucifix sur l'Autel de la petite Chapelle, où tous les iours les François, les Hurons, & les Iroquois alloient luy rendre leurs hommages. Et ainsi Dieu s'est voulu servir de la main d'un Barbare, pour faire triompher sa Croix au milieu de la Barbarie.

Finissons par la consideration des biens qui reuiennent au public, du seiour du Pere dans Onnontaghé. Pendant qu'il travailloit soigneusement au bien particulier de son Eglise, il n'espargnoit aucun de ses soins, pour le bien commun de tous les François.

C'est luy qui a destourné la hache des trois Nations Supérieures, de dessus nostestés; il a

90 *Relation de la Nouvelle France,*
écarté les meurtres, qui ont en-
sanglanté tous les ans nos terres
& nos maisons : Nous ne nous
souuenons que trop des malheurs
de l'an passé, qui nous font en-
cor gemir à present, n'ayans pas
cessé de donner nos larmes sur
nostre sang, qui a coulé depuis
Montreal iusqu'à Tadoussat ; c'est
à dire, dans près de cent lieuës de
païs. De plus, il nous a fait res-
pirer cét Esté, vn air que nous
n'auions point respiré depuis vn
assez long-temps : vn air de quel-
que paix & de quelque repos, &
nous a procuré la commodité de
faire nos semences sans trouble,
& nos moissons, qui sont assez
abondantes, sans estre teintes de
nostre sang.

Enfin, quelques -vns croyent,
qu'il a si bien fait, que nous n'a-

uons plus que deux nations d'Iroquois sur les bras, celle d'Onneiout, & celle d'Agnié. Ces deux nations sont à la verité les plus cruelles; mais les moins nombreuses, & les plus voisines. Pour les trois autres plus éloignées, elles se disent bien de nos amies, & de nos alliées, & cela par l'entremise du bon Pere le Moine: mais il ne faut prendre autre mesure avec les Sauvages, que celle de leur interest. Les nations qui ont receu la foy, s'attachent à nous pour l'interest de leur salut. Pour les autres, qui ne l'ont pas, receuës il n'y a que la fraieur, & crainte de nos armes, où l'esperance de quelque grand profit dans leur trafique, où le secours qu'elles peuvent tirer de nous contre leurs ennemis, qui les puissent arrester, & encor

92 *Relation de la Nouvelle France,*
cela n'empeschera - t'il pas , que
quelques - vns ne se débandent,
& ne nous viennent tuer à la dé-
robé, si bien qu'il n'y a que la seu-
le puissance presente & effectiue,
qui leur puisse fortement lier les
mains. C'est ce que nous atten-
dons du plus grand de tous les
Monarques Chrestiens: Il ne souf-
frira pas , que sa Nouvelle France
soit plus long - temps captiue sous
la tyrannie d'une poignée de Bar-
bares : I E S U S - C H R I S T se rend
foible, pour ainsi dire , afin de
luy donner suiet d'employer la
puissance qu'il luy a contée, pour
l'establir dans ces grands païs , &
pour luy donner , en suite , les
hautes recompences qu'il veut
rendre à sa pieté , à sa valeur , à sa
generosité. Amen, Amen , fiat,
fiat.

CHAPITRE VII.

De quelques meurtres faits par les Sauvages de Gaspé, sur les Sauvages nommez les Papinachouetkhi.

ENtrant dans le grand Golphe de Saint Laurens, pour tirer à Kebec, on rencontre du costé du Sud, trois endroits, où les Nauires François vont pescher des Mouluës. Ces Havres, ou ces ports sont fort voisins les vns des autres : on les nomme l'Isle Percée, Bonaventure, & Gaspé. Le Pere Martin Lyonne, decedé depuis peu, & le Pere André Richard, tous deux de nostre Compagnie, ont cultiué quelques années, les costes qui sont baignées des eaux de ce Golphe, comme

94 *Relation de la Nouvelle France,*
aussi les contrées circonuoisines.
Voicy comme le Pere Richard
nous parle, de l'entreprise de quel-
ques Sauvages, que nous appel-
lons de Gaspé, pour ce qu'ils se
viennent camper assés souuent
proche de la Baye, ou du Port,
qui porte ce nom. Ces Barbares
s'estans assemblez pendant l'hy-
uer de l'année passée 1661. quel-
ques-vns parlerent, dans leurs
Conseils, d'aller à la guerre con-
tre les Esquimaux. Ce sont des
peuples ennemis des Europeans,
qui habitent sur les riués du Gol-
phe, du costé du Nord, assez pro-
che de la grande Isle de Terre-
neufue, qui est située à l'embou-
cheure du grand fleuve, & du
grand Golphe de Saint Laurens.
En montant plus haut, sur les
mesmes riués, on trouue les Pa-

pinachiouekhi , les Bersiamites , en suite, & puis on rencontre Tadoussac. Ces deux dernieres Nations , & quelques autres qui leur sont alliées, sont bonnes & simples , gens de paix qui reçoivent nos Peres de Kebec avec grand amour, quand ils vont en Mission vers leurs quartiers. Mais venons à nos Sauvages de Gaspé.

Quelques vns ayans donc mis en auant, dans leurs Conseils , & dans leurs festins , des propositions de guerre , furent écoutez des vns , & rebutez des autres: Mais les Braues & les Insolens, s'estans raillez des pacifiques, vne trentaine de ieunes gens, ou environ , leuerent la hache , pour marque qu'ils vouloient la guerre.

Cela me toucha fort, dit le Pe-

96 *Relation de la Nouvelle France,*
re Richard , pour ce que leur
guerre n'est qu'une chasse aux
hommes qu'ils entreprennent as-
sés souvent, pour satisfaire à quel-
ques songes , qui , dans leur som-
meil, leur font croire, que les ames
de leurs parens deffunts, ne seront
point en repos, si on ne leur sa-
crifie des hommes. Ayant passé
tout l'hyuer dans ce dessein, ils
se rendirent au Prin-temps sur les
bords d'une Riuere nommée
Bacadensis, qui se va décharger
dans le Golfe. Je me trouuay avec
eux, & leur tesmoigna, dit le Pere,
la douleur que ie ressentois d'une
si legere entreprise ; me dou-
tant bien, qu'ils attaqueroient, &
qu'ils tueroient les premiers qu'ils
rencontreroient au delà du Golfe,
sans prendre garde s'ils sont amis,
ou s'ils sont ennemis, ils mépri-
serent

serent mes auis, & s'embarquerent d'une façon assés grotesques, & assés superstitieuse.

Comme ils estoient en festin, & en Conseil, on leur prepara deux Chaloupes. Ils acheptent ces Chaloupes des François, qui vont en pescherie vers leurs costes, & ils s'en seruent aussi adroitement, que nos plus braves, & plus lestes Matelots de France. Ils firent vn petit Pont de bois, pour se pourvoir embarquer à sec dans ces Chaloupes, qu'on tenoit expressement à flot. Cela fait, & le festin acheué, nos guerriers sortent d'une grande Cabane, bien armés, à leur mode, chantant, dancant, & puis courant promptement à leurs Chaloupes: Ceux qui s'embarquerent les derniers, ietterent à

98 *Relation de la Nouvelle France,*
l'eau dans vn moment, les bois
qui composoient leurs Ponts, &
prenant les rames en main d'une
vitesse incroyable, se mirent au
large en vn instant. Si quelqu'un
fust tombé à l'eau, ou qu'il se fust
moüillé en s'embarquant, ou si
la Chaloupe se fust échouée, ou
qu'elle eust retardé tant soit peu,
ce mauvais presage les auroit ar-
resté tout court, & leur auroit fait
changer de dessein. Quand quel-
qu'un est priué du flambeau de la
Foy, il prend aisement les tene-
bres pour la lumiere, la nuit,
pour le iour, & la folie & la sot-
tise pour la sagesse.

Comme ces Argonautes vo-
guoient à force de rames, sur la
Riuere Bacadensis, voilà deux
Canots qui sortent comme
d'une embuscade, & qui tirent

droit à eux, pour les attaquer, & pour les piller, & pour empêcher leur course. Ce sont de ieunes femmes bien lestes, & bien couvertes, qui viennent donner vne idée, & faire vn portrait du combat, que ces guerriers doiuent rendre à leurs ennemis. Elles vont, elles viennent, elles tournent, elles font mille caracolles à l'entour de ces Chaloupes, s'efforçant de se ietter dedans, pour les piller, ou du moins pour enleuer quelque butin: Bien attaqué, bien deffendu: les hommes les repoussent, ils tirent quantité de coups de fusils, plustost pour faire du bruit, que pour les blesser.

Enfin ces ieunes femmes se retirent, bien lassées, sans iamais auoir peu rien enleuer. Elles s'en

100 *Relation de la Nouvelle France*,
reuiennent à bord, où les autres
femmes, qui les attendoient, les
reçoient avec des cris, & des
huées, comme des ennemis vain-
cus : & se iettent sur elles, les des-
poüillent, leur ostent leurs robes
neuues & leurs ornemens, leur
donnant en la place de vieux hail-
lons. L'une de ces Amazones fut
raillée, & moquée, pour ce qu'elle
n'auoit pas pris la belle robe,
& ses beaux atours, se doutant
bien qu'on les luy rauiroit. Ces
femmes sont bien aises d'estre
ainsi pillées, pour donner vn heu-
reux pronostique de la victoire,
qu'elles souhaitent à leurs pa-
rens & à leurs amis.

Mais suiurons nos Guerriers.
Ils ne furent pas bien auant dans
le Golphe, que l'un d'eux fit faire
alte. le viens presentement, dit-

it, de me souuenir d'un ordre que l'un de mes parens nous a donné à la mort; vous sçauiez que les ordres des mourans sont d'importance, & que le deffunct estant homme de consideration parmi nous, il faut executer ses volontez: or comme elles repugnent à l'entreprise que j'ay faite inconsiderément, faute de memoire, ie suis obligé de rebrousser chemin, & de quitter les pensées de la guerre. Ceux qui ne s'estoient engagez dans ce party, que par vn respect purement humain, luy dirent, qu'ils le suiuoient, comme estans parens, ou amis du Trépassé. Voila donc l'Escoüade mi-partie, l'une des deux chaloupes met le Cap vers la terre, & s'en retourne à bord; l'autre armée de quinze Chasseurs, passe outre.

Ils arriuent enfin à l'Isle d'Anticosti, où le Golphe commence quasi à se changer en fleuve. L'ayant quittée, pour passer en terre-ferme du costé du Nord, ils apperceurent vn Canot, qui sortoit d'une autre Isle, d'où il venoit de chasser: le vent leur estant fauorable, ils courent dessus à voile & à rames: & sans s'enquister de quelle Nation il estoit, ils le foudroyent à coups d'arquebuses. C'est assez que ce soient des hommes, c'est la proye, & le gibier qu'ils cherchent. Ce Canot portoit vn homme & vne femme, vne fille, & vn petit garçon. Ils tuèrent, dès leur premiere descharge, l'homme, la femme & la fille, & blessèrent le petit garçon. Aussi-tost ils se iettent sur ces corps morts, leur coup-

pent & leur cernent la peau à l'entour de la teste, enleuent leurs chevelures, prennent le petit garçon, l'embarquent tout blessé, & voila leur guerre & leur chasse faite. Le vent se tournant, ils tournent leur Chaloupe, & s'en reuiennent en leur pais remplis de gloire d'un si heureux succès. Les Monarques qui font marcher de grands corps-d'armées, se moquent bien de ces pauvres Barbares, aussi glorieux dans la victoire de quatre hommes, que les grands Princes dans la mort de dix mille. Et les Anges ont sujet de se mocquer des vns & des autres, puis qu'ils font gloire d'abbreger la vie des hommes, qui est déjà si courte. Mais voyons le triomphe de nos superbes Conquerans.

Comme leur depart fut superstitieux , leur retour fut plein de folie & de cruauté. Approchant des riuës de leur païs , ils poussèrent vn grand cry , marque de leur victoire. Entendant la voix, dit le Pere qui a fourny ces Memoires , ie iugeay aussi tost qu'ils n'auoient pas esté iusques au païs de leurs ennemis , trop esloigné pour vn voyage de si peu de durée. Je me persuaday qu'ils auroient peut estre rencontré quelques Sauvages alliez de ceux de Tadoussac , qui s'en pourroient bien ressentir quelque iour. En effet , on me dit qu'ils auoient tué des Papinachioueki , bons amis des François, & de leurs alliez.

Au bruit, & au cry de ces Guerriers , tout le monde sort des

Cabanes, les François, qui estoient pour lors en cette coste, accourent aussi bien que les autres. Je ne voulus point paroistre, pour faire voir l'indignation que j'auois conceuë d'une action si lâche. Comme ils estoient assez esloignez de la terre où ils vouloient aborder, ils vserent d'une cruelle barbarie vers leur pauvre petit prisonnier: ils le precipiterent dedans l'eau tout blessé qu'il estoit en diuers endroits: ils ietterent à mesme temps les chevelures qu'ils auoient enleuées, donnant au pillage tout le butin qu'ils auoient pris sur leurs ennemis pretendus. Aussi tost, la plupart des Sauvages, hommes & femmes se iettent à la nage: les femmes tirent droit aux chevelures flottantes, & les hommes

106 *Relation de la Nouvelle France,*
au petit garçon, qui se noyoit :
Les femmes s'estant saisies des
chevelures, veulent raur aux
hommes le petit prisonnier. Ce
pauvre enfant se voyoit tiraillé
& deschiré, comme vne proye,
qui seroit tombée entre les pattes
de plusieurs loups, ou de plu-
sieurs lions : mais enfin apres
quantité de contestes, il fut ad-
jugé & donné à la femme du Ca-
pitaine, qui voulut faire paroi-
stre qu'elle auoit du cœur, aussi
bien que son mary, & qu'elle re-
gardoit couler le sang humain
sans blesmir & sans foiblesse. Elle
tire vn grand cousteau de son
sein, & le plonge inhumainement
dans le bras de cet enfant, déjà à
demy-mort, tant pour les blessures
qu'il auoit receuës au combat, que
pour la cruauté avec laquelle on

on l'auoit traitté dedans l'eau. Si fallut-il qu'il chantast à la veuë de son sang , qui ne luy fit iamais ietter aucune larme , ny aucun cry. L'impression que les parens donnent à leurs enfans , de monstrier du courage en tels rencontres , & le bruit & le tintamarre que font ces Barbares. estourdisent tellement les sens de leurs prisonniers , que les plus petits font mesme paroistre de la constance.

Nos François touchés de compassion, à la veuë d'un spectacle si triste, cherchoient les moyens de pouuoir deliurer cét enfant : mais il n'estoit pas encor temps. Je vous auouë qu'au recit qu'ils me firent d'un procedé si cruel, que ie n'auois pas voulu voir de mes yeux , mon cœur fut si indi-

108 *Relation de la Nouvelle France,*
gné, que sur le soir, ces super-
bes Thrasons venant se presenter
à la Chappelle, pour y estre in-
struits, & pour les faire prier
Dieu, ie les chassay, & leur fer-
may la porte de l'Eglise: leur di-
sant, que Dieu ne supportoit point
les meurtres, commis en la per-
sonne des Innocens; mais leur
cœurs estant encore tout bouffis
d'orgueil, le depot s'en empara,
& leur fit dire aux François, qu'ils
rencontrerent, qu'ils alloient cas-
ser la teste au prisonnier, & re-
monter en Chaloupe, pour aller
encor à la chasse des hommes.

Nos François m'ayans fait ce
rapport, adiouterent que c'estoit
fait de la vie de cét enfant, si ie
ne changeois de batterie. Cela me
toucha. Je cours aussi-tost, au
lieu où ils estoient essemblés, &

ie leur dy: Mes freres & mes ne-
veux, ie viens meller mes larmes
avec vos ioies, vous m'aués re-
duit à deux doigts de la mort; l'a-
mour que ie vous porte, est la
source de mes douleurs, & de mes
plaintes. Quand vn pere a perdu
son fils bien aimé, vous ne voyés
que des larmes, & vous n'enten-
dés que des soupirs: n'estes vous
pas mes enfans? comment vou-
lés vous que ie rie dans vostre
mal-heur? Vous estes morts de-
dans l'ame: vous aués fasché Dieu:
vous vous estes rendus esclaves
du Demon: Et vous voulés que
ie me reioüisse avec vous! Arra-
chés premierement de mon cœur,
l'amour que j'ay pour vous: laissés
moy pleurer, & lamenter vostre
peché. Mais en effet, dirent ils,
nous aimés tu? Oüy ie vous ai-

110 *Relation de la Nouvelle France,*
me, & plus tendrement que vous
ne pensés. Pourquoi donc nous
as tu fermé la porte de la Chap-
pelle? c'est l'amour qui m'a fait
faire ce coup, pour vous faire
rentrer dans vous mesmes, pour
vous ouvrir les yeux, afin que vous
laviés vos mains, encor toutes
sanglantes, deuant que vous pa-
roissiés deuant Dieu. Nous voyons
bien que tu nous aimes, repliquét
ils. Aime nous toujourns, mon Pe-
re, nous ne sommes plus fâchés:
nous t'aimons. Si vous m'aimés,
repart le Pere, ne tués point l'en-
fant, donnés luy la vie. Vas, mon
Pere! nous t'aimons, il ne mour-
ra point. Je me retiray assés con-
tent d'une si bonne parolle.

Cette escoüade s'estant retirée
à l'Isle percée, où ie me trouuay
aussi, donna le loisir au Chirar-

gien de nos François, qui estoient
là en pescherie, de panser ce pauvre
enfant. Il auoit quatre postes en
la teste, on en tira trois, on ne
peut auoir la quatrième, ny vne au-
tre qu'il auoit dans l'espaule; vn
trop grand effort l'auroit mis en
vn euident danger. Ce pauvre en-
fant ne ietta iamais qu'un petit
sourir, dans vne cure bien rude,
& bien douloureuse. Nos Fran-
çois firent tous leurs efforts, pour
le tirer des mains de ces Barbares,
mais sans aucun effet. Voyant
donc qu'ils estoient prest de l'em-
mener, & ne iugeant pas qu'il eut
plus de sept ans, paroissant si de-
fait, & si defiguré, ie l'ondoyay
avec vne instruction assez legere,
& sans aucune ceremonie, le tēps,
& le lieu ne le permettant pas.
Cela fait, on l'embarque, pour le

112 *Relation de la Nouvelle France* ;
transporter ailleurs. Le regret que
i'auois de voir enleuer ce pauvre
petit innocent , à qui la fantaisie
d'vn Sauvage , ou vn songe , pou-
uoit oster la vie , me fit resoudre
d'aller trouuer la femme du Ca-
pitaine , à qui il auoit esté donné.
Elle estoit sur le point de son de-
part , ie luy parlay à peu près en
ces termes.

Ma Sœur ! i'ay vne priere à te
faire , ie te supplie de ne me point
éconduire ; ie ne t'ay iamais rien
demandé , & ie n'ay pas d'enuie
de iamais te demander aucune
chose ; i'auouë que mon souhait
est grand , & que ma priere est
de consequence : Tu sçais ce que
i'ay fait pour toy , & les secours
que ie t'ay rendus dans les occa-
sions. Donnes-moy ton petit pri-
sonnier : il s'en va mourant , il ne
te

te rendra aucun service, les presens que ie te veux faire, te seront cent fois plus vtils, & plus avantageux puis que mesme il te fera à charge. L'aborde en suite son mary, ie luy propose les mesmes raisons; ie sy si bien, qu'ils me l'accorderent. On le fait sortir de la Chaloupe: on me le met entre les mains. Ils s'embarquent, leuent l'ancre, & s'en vont. Ie me retire bien ioieux avec ma proye, non sans étonnement de ce qu'ils ne m'auoient pas demandé le payement, deuant leur depart. Il est vray qu'ils me connoissoient, & qu'ils sçauoient bien que ie tiendrois ma parole.

Ils ne furent pas loing, qu'un vent contraire les reietta dans le port. Ils me viennent voir, & me parlent des presens que ie leur

114 *Relation de la Nouvelle France,*
auois fait esperer. le leur dy que i'e-
stois tout prest d'accóplir ma pro-
messe; mais que c'estoit à eux, de
me tesmoigner ce qu'ils auroient
pour agreable. Ils conuoquent le
Conseil, & m'y font appeller.
L'vn des anciens prit la parolle,
& apres auoir exaggeré la gran-
deur du present qu'ils me fai-
soient, ils m'asseura que l'amour,
& le respect qu'ils auoient pour
moy, les bornoit à fort peu de cho-
ses: il ne laissa pas de demander
vn prix excessif.

le leur repliquay qu'ils auoient
raison de demander beaucoup, &
que la vie d'vn homme estoit
trop precieuse, pour estre suffi-
samment payée par des pre-
sents: mais qu'ils n'ignoroient pas
que i'auois les bras, & les mains
fort cours, & fort petis, & que ie

ne pouuois pas embrasser quantité de choses, qu'il y auoit longtemps que mes mains estoient roûjours ouuertes, pour leur faire du bien dans leurs besoins, qu'il ne me restoit plus que ce que ie leur presentois, & que i'exposay à leur veüe. Ils l'accepterent, se monstrans fort satisfaits, & moy encor plus, voyant qu'on ne pourroit plus redemander mon petit rachepté, la chose s'estant passée, dans le Conseil des plus considerables.

Ce pauvre enfant se trouuant par vn heureux malheur, parmy nos François, qui le caressoient, & qui le cherissoient tendrement, commença à respirer, & à croire qu'il estoit du nombre des viuans. On le panse, on le choye, on le nourrit soi-

116 *Relation de la Nouvelle France,*
gneusement, si bien qu'en peu
de temps, celuy à qui dans sa mi-
sere, & dans ses tourmens, ie
n'auois donné que sept ans, me
parut, dans son embonpoint,
âgé d'environ dix ou douze.
Quand il ne voioit que des Fran-
çois, il estoit éveillé, il estoit guay,
& il paroissoit tout réply d'esprit;
mais sitost qu'il voioit vn Sauua-
ge, il s'enfuoit, il se cachoit tout
tremblant de peur & tout hebeté.

Or comme il me fallut retour-
ner en France, & que ie ne trou-
uay aucune commodité pour l'en-
uoier à Kebec, ie l'ay amené avec
moy. Il est fort ioly, pour vn en-
fant né dans la Barbarie. Il a vne
si grande crainte des Sauvages,
ayant experimenté leur cruauté,
que passant par Roüen, pour ve-
nir à Paris, & ayant apperceu

dans les ruës , & entendu le cry
d'un ramonneur de cheminée
qu'il prit pour un Sauvage, la peur
le saisit si fortement qu'il s'enfuit
d'as une boutique, & se cacha; mais
avec une telle épouuante, que
sa parole ne pouuoit le rassu-
rer. Il est maintenant dans nostre
College de Clermont, où il fait
assés voir, que nos petis Cana-
diens n'ont guere moins d'esprit,
que nos petis François. Il est d'un
naturel fort souple, & fort do-
cile: son corps a esté mal traitté
par les Sauvages: sa couleur est
oliuastre, à cause des huiles dont
il a esté oint dès sa neissance: il
ne seroit pas moins blanc, que les
enfans des Europeans, qui nais-
sent en la Nouvelle-France, si on
ne l'auoit noircy, & peint en huile
pour ainsi dire, dès son enfance.

Je diray pour conclusion, que moy qui fais imprimer ce chapitre, l'ayant interrogé en sa langue sur ses parens, il m'a dit ces parolles: Mon pere a tué ma grande mere, & trois autres de mes parens: luy en demandant la raison: il estoit, m'a t'il dit, en colere, si bien, que vous diriés que Dieu a enuoyé les Sauvages de Gaspé, comme les executeurs de sa iustice, pour tirer vengeance de ce crime.

FIN.

Permission du R. P. Prouincial.

NOVS CLAVDE BOUCHER
Prouincial de la Compagnie de IESVS, en la Prouince de France, auons accordé pour l'aue nir au Sieur SEBASTIEN CRAMOISY, Imprimeur ordinaire du Roy & de la Reyne, Directeur de l'Imprimerie Royale du Louure, & ancien Escheuin de cette ville de Paris, l'Impression de la Relation de la Nouvelle-France. A Paris, le 8. Ianuier mil six cens soixante-vn.

Signé, CLAVDE BOUCHER.